

Romiyon

Salām

¹ Yih khat Masīh Īsā ke ḡhulām Paulus kī taraf se hai jise rasūl hone ke lie bulāyā aur Allāh kī kḡhushkḡhabrī kī munādī karne ke lie alag kiyā gayā hai.

² Pāk nawishton meñ darj is kḡhushkḡhabrī kā wādā Allāh ne pahle hī apne nabiyon se kar rakhā thā.

³ Aur yih paighām us ke Farzand Īsā ke bāre meñ hai. Insānī lihāz se wuh Dāūd kī nasl se paidā huā,

⁴ jabki Rūhul-quds ke lihāz se wuh qudrat ke sāth Allāh kā Farzand ṡhahrā jab wuh murdon meñ se jī uṡhā. Yih hai hamāre Kḡhudāwand Īsā Masīh ke bāre meñ Allāh kī kḡhushkḡhabrī.

⁵ Masīh se hameñ rasūlī ikḡhtiyār kā yih fazl hāsil huā hai ki ham tamām ḡhairyahūdiyon meñ munādī karenṡ tākī wuh imān lā kar us ke tābe ho jāeñ aur yonṡ Masīh ke nām ko jalāl mile.

⁶ Āp bhī un ḡhairyahūdiyon meñ se haiñ, jo Īsā Masīh ke bulāe hue haiñ.

⁷ Maiñ āp sab ko likh rahā hūñ jo Rom meñ Allāh ke pyāre haiñ aur maḡhsūs-o-muḡaddas hone ke lie bulāe gae haiñ.

Kḡhudā hamārā Bāp aur Kḡhudāwand Īsā Masīh āp ko fazl aur salāmatī atā karenṡ.

Rom Jāne kī Ārzū

⁸ Awwal, main āp sab ke lie Īsā Masīh ke wasīle se apne Ḳhudā kā shukr kartā hūn, kyonki pūrī duniyā meñ āp ke imān kā charchā ho rahā hai.

⁹ Ḳhudā hī merā gawāh hai jis kī ḳhidmat main apnī rūh meñ kartā hūn jab main us ke Farzand ke bāre meñ ḳhushḳhabrī phailātā hūn, main lagātār āp ko yād kartā rahtā hūn

¹⁰ aur har waqt apnī duāon meñ minnat kartā hūn ki Allāh mujhe āḳhirkār āp ke pās āne kī kāmyābī atā kare.

¹¹ Kyonki main āp se milne kā ārzūmand hūn. Main chāhtā hūn ki mere zariye āp ko kuchh ruhānī barkat mil jāe aur yon āp mazbūt ho jāen.

¹² Yānī āne kā maqsad yih hai ki mere imān se āp kī hauslā-afzāī kī jāe aur isi tarah āp ke imān se merā hauslā bhī barh jāe.

¹³ Bhāiyo, āp ke ilm meñ ho ki main ne bahut dafā āp ke pās āne kā irādā kiyā. Kyonki jis tarah dīgar Ḡhairyahūdī aqwām meñ merī ḳhidmat se phal paidā huā hai usī tarah āp meñ bhī phal deḳhnā chāhtā hūn. Lekin āj tak mujhe rokā gayā hai.

¹⁴ Bāt yih hai ki yih ḳhidmat saranjām denā merā farz hai, ḳhāh Yūnāniyon meñ ho yā Ḡhairyūnāniyon meñ, ḳhāh dānāon meñ ho yā nādānon meñ.

¹⁵ Yihī wajah hai ki main āp ko bhī jo Rom meñ rahte haiñ Allāh kī ḳhushḳhabrī sunāne kā mushtāq hūn.

Allāh kī Ḳhushḳhabrī kī Quدرات

¹⁶ Maiñ to khushkhabrī ke sabab se sharmātā nahīñ, kyonki yih Allāh kī qudrat hai jo har ek ko jo imān lātā hai najāt detī hai, pahle Yahūdiyon ko, phir Ghairyahūdiyon ko.

¹⁷ Kyonki is khushkhabrī meñ Allāh kī hī rāstbāzī zāhir hotī hai, wuh rāstbāzī jo shurū se ākhir tak imān par mabnī hai. Yihī bāt kalām-e-muqaddas meñ darj hai jab likhā hai, “Rāstbāz imān hī se jītā rahegā.”

Insān par Allāh kā Ghazab

¹⁸ Lekin Allāh kā ghazab āsmān par se un tamām bedīn aur nārāst logoñ par nāzil hotā hai jo sachchāi ko apnī nārāstī se dabāe rakhte haiñ.

¹⁹ Jo kuchh Allāh ke bāre meñ mālūm ho saktā hai wuh to un par zāhir hai, hañ Allāh ne khud yih un par zāhir kiyā hai.

²⁰ Kyonki duniyā kī taḥlīq se le kar āj tak insān Allāh kī andekhī fitrat yāñi us kī azlī qudrat aur ulūhiyat maḥlūqāt kā mushāhadā karne se pahchān saktā hai. Is lie un ke pās koī uzr nahīñ.

²¹ Allāh ko jānane ke bāwujūd unhoñ ne use wuh jalāl na diyā jo us kā haq hai, na us kā shukr adā kiyā balki wuh bātil khayālāt meñ paṛ gae aur un ke besamajh diloñ par tārikī chhā gaī.

²² Wuh dāwā to karte the ki ham dānā haiñ, lekin ahmaq sābit hue.

²³ Yoñ unhoñ ne ghairfāñi Khudā ko jalāl dene ke bajāe aise butoñ kī pūjā kī jo fāñi insān, parindoñ, chaupāiyon aur reñgne wāle jānwaroñ kī sūrat meñ banāe gae the.

24 Is lie Allāh ne unheñ un najis kāmon meñ chhoṛ diyā jo un ke dil karnā chāhte the. Natije meñ un ke jism ek dūsre se behurmat hote rahe.

25 Hāñ, unhoñ ne Allāh ke bāre meñ sachchāi ko radd karke jhūṭ ko apnā liyā aur maḥlūqāt kī parastish aur ḳhidmat kī, na ki Ḳhāliq kī, jis kī tārif abad tak hotī rahe, āmīn.

26 Yihī wajah hai ki Allāh ne unheñ un kī sharmnāk shahwaton meñ chhoṛ diyā. Un kī ḳhawātīn ne fitratī jinsī tālluqāt ke bajāe ḡhairfitratī tālluqāt rakhe.

27 Isī tarah mard ḳhawātīn ke sāth fitratī tālluqāt chhoṛ kar ek dūsre kī shahwat meñ mast ho gae. Mardoñ ne mardoñ ke sāth behayā harkateñ karke apne badanoñ meñ apnī is gumrahī kā munāsib badlā pāyā.

28 Aur chūñki unhoñ ne Allāh ko jānane se inkār kar diyā is lie us ne unheñ un kī makrūh soch meñ chhoṛ diyā. Aur is lie wuh aisī harkateñ karte rahte haiñ jo kabhī nahīñ karnī chāhieñ.

29 Wuh har tarah kī nārāstī, shar, lālch aur burāi se bhare hue haiñ. Wuh hasad, ḳhūñrezī, jhagare, fareb aur kīnāwarī se labrez haiñ. Wuh chuḡhlī khāne wāle,

30 tohmat lagāne wāle, Allāh se nafrat karne wāle, sarkash, maḡhrūr, sheḳhībāz, badī ko ijād karne wāle, māñ-bāp ke nāfarmān,

31 besamajh, bewafā, sangdil aur berahm haiñ.

32 Agarche wuh Allāh kā farmān jānte haiñ ki aisā karne wāle sazā-e-maut ke mustahiḳ haiñ to bhī wuh aisā karte haiñ. Na sirf yih balki wuh

aisā karne wāle dīgar logoñ ko shābāsh bhī dete haiñ.

2

Allāh kī Rāst Adālat

¹ Ai insān, kyā tū dūsroñ ko mujrim ṭhahrātā hai? Tū jo koī bhī ho terā koī uzr nahīñ. Kyonki tū ḳhud bhī wuhī kuchh kartā hai jis meñ tū dūsroñ ko mujrim ṭhahrātā hai aur yoñ apne ap ko bhī mujrim qarār detā hai.

² Ab ham jānte haiñ ki aise kām karne wāloñ par Allāh kā faislā munsifānā hai.

³ Tāham tū wuhī kuchh kartā hai jis meñ tū dūsroñ ko mujrim ṭhahrātā hai. Kyā tū samajhtā hai ki ḳhud Allāh kī adālat se bach jāegā?

⁴ Yā kyā tū us kī wasī mehrbānī, tahammul aur sabar ko haqīr jāntā hai? Kyā tujhe mālūm nahīñ ki Allāh kī mehrbānī tujhe taubā tak le jānā chāhtī hai?

⁵ Lekin tū haṭdharm hai, tū taubā karne ke lie taiyār nahīñ aur yoñ apnī sazā meñ izāfā kartā jā rahā hai, wuh sazā jo us din dī jāegī jab Allāh kā ḡhazab nāzil hogā, jab us kī rāst adālat zāhir hogī.

⁶ Allāh har ek ko us ke kāmōñ kā badlā degā.

⁷ Kuchh log sābitqadmī se nek kām karte aur jalāl, izzat aur baqā ke tālib rahte haiñ. Unheñ Allāh abadī zindagī atā karegā.

⁸ Lekin kuchh log ḳhudḡharz haiñ aur sachchāī kī nahīñ balki nārāstī kī pairawī karte haiñ. Un par Allāh kā ḡhazab aur qahr nāzil hogā.

⁹ Musibat aur pareshānī har us insān par āegī jo burāī kartā hai, pahle Yahūdī par, phir Yūnānī par.

¹⁰ Lekin jalāl, izzat aur salāmatī har us insān ko hāsīl hogī jo nekī kartā hai, pahle Yahūdī ko, phir Yūnānī ko.

¹¹ Kyoṅki Allāh kisī kā bhī tarafdār nahīn.

¹² Ghairyahūdiyon ke pās Mūsawī shariyat nahīn hai, is lie wuh shariyat ke baḡhair hī gunāh karke halāk ho jāte haiṅ. Yahūdiyon ke pās shariyat hai, lekin wuh bhī nahīn bacheṅge. Kyoṅki jab wuh gunāh karte haiṅ to shariyat hī unheṅ mujrim ṭhahrātī hai.

¹³ Kyoṅki Allāh ke nazdik yih kāfi nahīn ki ham shariyat kī bāteṅ sunēṅ balki wuh hameṅ us waqt hī rāstbāz qarār detā hai jab shariyat par amal bhī karte haiṅ.

¹⁴ Aur go Ghairyahūdiyon ke pās shariyat nahīn hotī lekin jab bhī wuh fitratī taur par wuh kuchh karte haiṅ jo shariyat farmātī hai to zāhir karte haiṅ ki go hamāre pās shariyat nahīn to bhī ham apne āp ke lie kḡhud shariyat haiṅ.

¹⁵ Is meṅ wuh sābit karte haiṅ ki shariyat ke taqāze un ke dil par likhe hue haiṅ. Un kā zamīr bhī is kī gawāhī detā hai, kyoṅki un ke kḡhayālāt kabhī ek dūsre kī mazammat aur kabhī ek dūsre kā difā bhī karte haiṅ.

¹⁶ Gharz, merī kḡhushkḡhabrī ke mutābiq har ek ko us din apnā ajr milegā jab Allāh Īsā Masīh kī mārifat insānon kī poshidā bāton kī adālat karegā.

Yahūdī aur Shariyat

17 Achchhā, tū apne āp ko Yahūdī kahtā hai. Tū sharīat par inhisār kartā aur Allāh ke sāth apne tālluq par faḡhr kartā hai.

18 Tū us kī marzī ko jāntā hai aur sharīat kī tālīm pāne ke bāis sahīh rāh kī pahchān rakhtā hai.

19 Tujhe pūrā yaqīn hai, ‘Main andhoñ kā qāyḡd, tārikī meñ basne wāloñ kī raushnī,

20 besamjhoñ kā muallim aur bachchoñ kā ustād hūñ.’ Ek lihāz se yih durust bhī hai, kyoñki sharīat kī sūrat meñ tere pās ilm-o-irfān aur sachchāi maujūd hai.

21 Ab batā, tū jo auroñ ko sikhātā hai apne āp ko kyoñ nahīñ sikhātā? Tū jo chorī na karne kī munādī kartā hai, ḡhud chorī kyoñ kartā hai?

22 Tū jo auroñ ko zinā karne se manā kartā hai, ḡhud zinā kyoñ kartā hai? Tū jo butoñ se ghin khātā hai, ḡhud mandiroñ ko kyoñ lūṡṡā hai?

23 Tū jo sharīat par faḡhr kartā hai, kyoñ is kī ḡhilāfwarzī karke Allāh kī be'izzatī kartā hai?

24 Yih wuhī bāt hai jo kalām-e-muḡaddas meñ likhī hai, “Tumhāre sabab se ḡhairyahūḡdiyōñ meñ Allāh ke nām par kufr bakā jātā hai.”

25 Ḳhatne kā fāyḡdā to us waḡt hotā hai jab tū sharīat par amal kartā hai. Lekin agar tū us kī hukmadūlī kartā hai to tū nāmaḡhtūn jaisā hai.

26 Is ke baraks agar nāmaḡhtūn Ḳhairyahūḡdī sharīat ke taḡāzoñ ko pūrā kartā hai to kyā Allāh use maḡhtūn Yahūdī ke barābar nahīñ ṡhahrāegā?

27 Chunāñche jo nāmaḡhtūn Ḳhairyahūḡdī sharīat par amal karte haiñ wuh āp Yahūḡdiyōñ

ko mujrim ṭhahrāeṅge jin kā ḵhatnā huā hai aur jin ke pās sharīat hai, kyonki āp sharīat par amal nahīn karte.

²⁸ Āp is binā par haqīqī Yahūdī nahīn haiṅ ki āp ke wālidain Yahūdī the yā āp ke badan kā ḵhatnā zāhirī taur par huā hai.

²⁹ Balki haqīqī Yahūdī wuh hai jo bātin meṅ Yahūdī hai. Aur haqīqī ḵhatnā us waqt hotā hai jab dil kā ḵhatnā huā hai. Aisā ḵhatnā sharīat se nahīn balki Rūhul-quds ke wasīle se kiyā jātā hai. Aur aise Yahūdī ko insān kī taraf se nahīn balki Allāh kī taraf se tārif miltī hai.

3

¹ To kyā Yahūdī hone kā yā ḵhatnā kā koī fāyda hai?

² Jī hān, har tarah kā! Awwal to yih ki Allāh kā kalām un ke sapurd kiyā gayā hai.

³ Agar un meṅ se bāz bewafā nikle to kyā huā? Kyā is se Allāh kī wafādārī bhī ḵhatm ho jāegī?

⁴ Kabhī nahīn! Lāzim hai ki Allāh sachchā ṭhahre go har insān jhūṭā hai. Yoṅ kalām-e-muqaddas meṅ likhā hai, “Lāzim hai ki tū bolte waqt rāst ṭhahre aur adālat karte waqt ḡhālib āe.”

⁵ Koī kah saktā hai, “Hamārī nārāstī kā ek achchhā maqsad hotā hai, kyonki is se logoṅ par Allāh kī rāstī zāhir hotī hai. To kyā Allāh be’insāf nahīn hogā agar wuh apnā ḡhazab ham par nāzil kare?” (Main insānī ḵhayāl pesh kar rahā hūn.)

⁶ Hargiz nahīn! Agar Allāh rāst na hotā to phir wuh duniyā kī adālat kis tarah kar saktā?

⁷ Shāyad koī aur etarāz kare, “Agar merā jhūṭ Allāh kī sachchāi ko kasrat se numāyān kartā

hai aur yoñ us kā jalāl baṛhtā hai to wuh mujhe kyoñkar gunāhgār qarār de saktā hai?”

⁸ Kuchh log ham par yih kufr bhī bakte haiñ ki ham kahte haiñ, “Āo, ham burāi karen̄ tākī bhalāi nikle.” Insāf kā taqāzā hai ki aise logoñ ko mujrim ṭhahrāyā jāe.

Koī Rāstbāz Nahīn

⁹ Ab ham kyā kaheñ? Kyā ham Yahūdī dūsron se bartar haiñ? Bilkul nahīn. Ham to pahle hī yih ilzām lagā chuke haiñ ki Yahūdī aur Yūnānī sab hī gunāh ke qabze meñ haiñ.

¹⁰ Kalām-e-muqaddas meñ yoñ likhā hai,
“Koī nahīn jo rāstbāz hai, ek bhī nahīn.

¹¹ Koī nahīn jo samajhdār hai,
koī nahīn jo Allāh kā tālib hai.

¹² Afsos, sab sahīh rāh se bhaṭak gae.
Sab ke sab bigar gae haiñ.

Koī nahīn jo bhalāi kartā ho, ek bhī nahīn.

¹³ Un kā galā khulī qabr hai,
un kī zabān fareb detī hai.

Un ke hoñṭoñ meñ sāñp kā zahr hai.

¹⁴ Un kā muñh lānat aur karwāhaṭ se bharā hai.

¹⁵ Un ke pāñw ḳhūn bahāne ke lie jaldī karte haiñ.

¹⁶ Apne pīchhe wuh tabāhī-o-barbādī chhoṛ jāte haiñ,

¹⁷ aur wuh salāmatī kī rāh nahīn jānte.

¹⁸ Un kī āñkhoñ ke sāmne Ḳhudā kā ḳhauf nahīn hotā.”

¹⁹ Ab ham jānte haiñ ki shariyat jo kuchh farmātī hai unheñ farmātī hai jin ke sapurd wuh kī gāi hai. Maqsad yih hai ki har insān ke

bahāne khatm kie jāen aur tamām duniyā Allāh ke sāmne mujrim ṭhahre.

²⁰ Kyoṅki shariyat ke taqāze pūre karne se koī bhī us ke sāmne rāstbāz nahīn ṭhahar saktā, balki shariyat kā kām yih hai ki hamāre andar gunāhgār hone kā ehsās paidā kare.

Rāstbāz Hone ke lie Īmān Zarūrī Hai

²¹ Lekin ab Allāh ne ham par ek rāh kā inkishāf kiyā hai jis se ham shariyat ke baḡhair hī us ke sāmne rāstbāz ṭhahar sakte haiṅ. Tauret aur nabiyon ke sahiḡe bhī is kī tasdiq karte haiṅ.

²² Rāh yih hai ki jab ham Īsā Masīh par īmān lāte haiṅ to Allāh hamen rāstbāz qarār detā hai. Aur yih rāh sab ke lie hai. Kyoṅki koī bhī farq nahīn,

²³ sab ne gunāh kiyā, sab Allāh ke us jalāl se mahrūm haiṅ jis kā wuh taqāzā kartā hai,

²⁴ aur sab muft men Allāh ke fazl hī se rāstbāz ṭhahrāe jāte haiṅ, us fidie ke wasīle se jo Masīh Īsā ne diyā.

²⁵ Kyoṅki Allāh ne Īsā ko us ke khūn ke bāis kaffārā kā wasīlā banā kar pesh kiyā, aisā kaffārā jis se īmān lāne wālon ko gunāhon kī muāfi miltī hai. Yoṅ Allāh ne apnī rāstī zāhir kī, pahle māzī men jab wuh apne sabr-o-tahammul men gunāhon kī sazā dene se bāz rahā

²⁶ aur ab maujūdā zamāne men bhī. Is se wuh zāhir kartā hai ki wuh rāst hai aur har ek ko rāstbāz ṭhahrātā hai jo Īsā par īmān lāyā hai.

²⁷ Ab hamārā faḡhr kahān rahā? Use to khatm kar diyā gayā hai. Kis shariyat se? Kyā āmāl kī shariyat se? Nahīn, balki īmān kī shariyat se.

²⁸ Kyoñki ham kahte haiñ ki insān ko īmān se rāstbāz ṭhahrāyā jātā hai, na ki āmāl se.

²⁹ Kyā Allāh sirf Yahūdiyon kā Ḳhudā hai? Ḡhairyahūdiyon kā nahīn? Hāñ, Ḡhairyahūdiyon kā bhī hai.

³⁰ Kyoñki Allāh ek hī hai jo maḳhtūn aur nāmaḳhtūn donoñ ko īmān hī se rāstbāz ṭhahrāegā.

³¹ Phir kyā ham shariāt ko īmān se mansūḳh karte haiñ? Hargiz nahīn, balki ham shariāt ko qāym rakhte haiñ.

4

Ibrāhīm Īmān se Rāstbāz Ṭhahrā

¹ Ibrāhīm jismānī lihāz se hamārā bāp thā. To rāstbāz ṭhaharne ke silsile meñ us kā kyā tajrabā thā?

² Ham kah sakte haiñ ki agar wuh shariāt par amal karne se rāstbāz ṭhahartā to wuh apne āp par faḳhr kar saktā thā. Lekin Allāh ke nazdīk us ke pās apne āp par faḳhr karne kā koī sabab na thā.

³ Kyoñki kalām-e-muqaddas meñ likhā hai, “Ibrāhīm ne Allāh par bharosā rakhā. Is binā par Allāh ne use rāstbāz qarār diyā.”

⁴ Jab log kām karte haiñ to un kī mazdūrī koī ḳhās mehrbānī qarār nahīn dī jātī, balki yih to un kā haq bantā hai.

⁵ Lekin jab log kām nahīn karte balki Allāh par īmān rakhte haiñ jo bedīnoñ ko rāstbāz qarār detā hai to un kā koī haq nahīn bantā. Wuh

un ke īmān hī kī binā par rāstbāz qarār die jāte haiñ.

⁶ Dāūd yihī bāt bayān kartā hai jab wuh us shaḡhs ko mubāarak kahtā hai jise Allāh baḡhair āmāl ke rāstbāz ṭhahrātā hai,

⁷ “Mubāarak haiñ wuh jin ke jarāym muāf kie gae.

Jin ke gunāh dhāñpe gae haiñ.

⁸ Mubāarak hai wuh jis kā gunāh Rab hisāb meñ nahīñ lāegā.”

⁹ Kyā yih mubāarakbādī sirf maḡhtūnoñ ke lie hai yā nāmaḡhtūnoñ ke lie bhī? Ham to bayān kar chuke haiñ ki Ibrāhīm īmān kī binā par rāstbāz ṭhahrā.

¹⁰ Use kis hālat meñ rāstbāz ṭhahrāyā gayā? Ḳhatnā karāne ke bād yā pahle? Ḳhatne ke bād nahīñ balki pahle.

¹¹ Aur ḡhatnā kā jo nishān use milā wuh us kī rāstbāzī kī muhr thī, wuh rāstbāzī jo use ḡhatnā karāne se peshtar milī, us waqt jab wuh īmān lāyā. Yoñ wuh un sab kā bāp hai jo baḡhair ḡhatnā karāe īmān lāe haiñ aur is binā par rāstbāz ṭhaharte haiñ.

¹² Sāth hī wuh ḡhatnā karāne wāloñ kā bāp bhī hai, lekin un kā jin kā na sirf ḡhatnā huā hai balki jo hamāre bāp Ibrāhīm ke us īmān ke naqsh-e-qadam par chalte haiñ jo wuh ḡhatnā karāne se peshtar rakhtā thā.

Allāh kā Wādā Īmān se Hāsil Hotā Hai

¹³ Jab Allāh ne Ibrāhīm aur us kī aulād se wādā kiyā ki wuh duniyā kā wāris hogā to us ne yih is lie nahīñ kiyā ki Ibrāhīm ne shariyat kī pairawī

kī balki is lie ki wuh īmān lāyā aur yoñ rāstbāz ṭhahrāyā gayā.

¹⁴ Kyoñki agar wuh wāris haiñ jo shariyat ke pairokār haiñ to phir īmān beasar ṭhahrā aur Allāh kā wādā miṭ gayā.

¹⁵ Sharīat Allāh kā ḡhazab hī paidā kartī hai. Lekin jahān koī shariyat nahīñ wahāñ us kī ḡhilāfwarzī bhī nahīñ.

¹⁶ Chunāñche yih mīrās īmān se miltī hai tāki is kī buniyād Allāh kā fazl ho aur is kā wādā Ibrāhīm kī tamām nasl ke lie ho, na sirf shariyat ke pairokāroñ ke lie balki un ke lie bhī jo Ibrāhīm kā-sā īmān rakhte haiñ. Yihī ham sab kā bāp hai.

¹⁷ Yoñ Allāh kalām-e-muqaddas meñ us se wādā kartā hai, “Maiñ ne tujhe bahut qaumoñ kā bāp banā diyā hai.” Allāh hī ke nazdīk Ibrāhīm ham sab kā bāp hai. Kyoñki us kā īmān us Ḳhudā par thā jo murdoñ ko zindā kartā aur jis ke hukm par wuh kuchh paidā hotā hai jo pahle nahīñ thā.

¹⁸ Ummīd kī koī kiran dikhāī nahīñ detī thī, phir bhī Ibrāhīm ummīd ke sāth īmān rakhtā rahā ki maiñ zarūr bahut qaumoñ kā bāp banūngā. Aur āḡhirkār aisā hī huā, jaisā kalām-e-muqaddas meñ wādā kiyā gayā thā ki “Terī aulād itnī hī beshumār hogī.”

¹⁹ Aur Ibrāhīm kā īmān kamzor na paṛā, hālāñki use mālūm thā ki maiñ taqṛīban sau sāl kā hūñ aur merā aur Sārā ke badan goyā murdā haiñ, ab bachche paidā karne kī umr Sārā ke lie guzar chukī hai.

²⁰ To bhī Ibrāhīm kā īmān ḡhatm na huā, na us ne Allāh ke wāde par shak kiyā balki īmān meñ wuh mazīd mazbūt huā aur Allāh ko jalāl

detā rahā.

²¹ Use puḡhtā yaqīn thā ki Allāh apne wāde ko pūrā karne kī qudrat rakhtā hai.

²² Us ke is īmān kī wajah se Allāh ne use rāstbāz qarār diyā.

²³ Kalām-e-muḡaddas meñ yih bāt ki Allāh ne use rāstbāz qarār diyā na sirf us kī ḡhātir likhī gai

²⁴ balki hamārī ḡhātir bhī. Kyonki Allāh hameñ bhī rāstbāz qarār degā agar ham us par īmān rakheñ jis ne hamāre Ḳhudāwand Īsā ko murdoñ meñ se zindā kiyā.

²⁵ Hamārī hī ḡhatāoñ kī wajah se use maut ke hawāle kiyā gayā, aur hameñ hī rāstbāz qarār dene ke lie use zindā kiyā gayā.

5

Rāstbāzī kā Anjām

¹ Ab chūnki hameñ īmān se rāstbāz qarār diyā gayā hai is lie Allāh ke sāth hamārī sulah hai. Is sulah kā wasilā hamārā Ḳhudāwand Īsā Masīh hai.

² Hamāre īmān lāne par us ne hameñ fazl ke us maḡām tak pahuñchāyā jahān ham āj qāym haiñ. Aur yoñ ham is ummīd par faḡhr karte haiñ ki ham Allāh ke jalāl meñ sharīk hoñge.

³ Na sirf yih balki ham us waḡt bhī faḡhr karte haiñ jab ham musībatoñ meñ phañse hote haiñ. Kyonki ham jānte haiñ ki musībat se sābitqadmī paidā hotī hai,

⁴ sābitqadmī se puḡhtagī aur puḡhtagī se ummīd.

⁵ Aur ummīd hamen sharmindā hone nahīn detī, kyonki Allāh ne hamen Rūhul-quds de kar us ke wasīle se hamāre dilon meñ apnī muhabbat unḍelī hai.

⁶ Kyonki ham abhī kamzor hī the to Masīh ne ham bedīnon kī ḳhātir apnī jān de dī.

⁷ Mushkil se hī koī kisī rāstbāz kī ḳhātir apnī jān degā. Hāñ, mumkin hai ki koī kisī nekokār ke lie apnī jān dene kī jurrat kare.

⁸ Lekin Allāh ne ham se apnī muhabbat kā izhār yon kiyā ki Masīh ne us waqt hamārī ḳhātir apnī jān dī jab ham gunāhgār hī the.

⁹ Hamen Masīh ke ḳhūn se rāstbāz ṭhahrāyā gayā hai. To yih bāt kitnī yaqīnī hai ki ham us ke wasīle se Allāh ke ḡhazab se bacheṅge.

¹⁰ Ham abhī Allāh ke dushman hī the jab us ke Farzand kī maut ke wasīle se hamārī us ke sāth sulah ho gai. To phir yih bāt kitnī yaqīnī hai ki ham us kī zindagī ke wasīle se najāt bhī pāeṅge.

¹¹ Na sirf yih balki ab ham Allāh par faḳhr karte haiñ aur yih hamāre Ḳhudāwand Īsā Masīh ke wasīle se hai, jis ne hamārī sulah karāī hai.

Ādam aur Masīh

¹² Jab Ādam ne gunāh kiyā to us ek hī shaḳhs se gunāh duniyā meñ āyā. Is gunāh ke sāth sāth maut bhī ā kar sab ādmiyon meñ phail gai, kyonki sab ne gunāh kiyā.

¹³ Sharīat ke inkishāf se pahle gunāh to duniyā meñ thā, lekin jahāñ sharīat nahīn hotī wahāñ gunāh kā hisāb nahīn kiyā jātā.

14 Tāham Ādam se le kar Mūsā tak maut kī hukūmat jāri rahī, un par bhī jinhoñ ne Ādam kī-sī hukmadūli na kī.

Ab Ādam āne wāle Īsā Masīh kī taraf ishārā thā.

15 Lekin in donoñ meñ baṛā farq hai. Jo nemat Allāh muft meñ detā hai wuh Ādam ke gunāh se mutābiqat nahīn rakhtī. Kyonki is ek shaḡhs Ādam kī ḡhilāfwarzī se bahut-se log maut kī zad meñ ā gae. Lekin Allāh kā fazl kahīn zyādā muassir hai, wuh muft nemat jo bahutoñ ko us ek shaḡhs Īsā Masīh meñ milī hai.

16 Hāñ, Allāh kī is nemat aur Ādam ke gunāh meñ bahut farq hai. Us ek shaḡhs Ādam ke gunāh ke natīje meñ hameñ to mujrim qarār diyā gayā, lekin Allāh kī muft nemat kā asar yih hai ki hameñ rāstbāz qarār diyā jātā hai, go ham se beshumār gunāh sarzad hue haiñ.

17 Is ek shaḡhs Ādam ke gunāh ke natīje meñ maut sab par hukūmat karne lagī. Lekin is ek shaḡhs Īsā Masīh kā kām kitnā zyādā muassir thā. Jitne bhī Allāh kā wāfir fazl aur rāstbāzī kī nemat pāte haiñ wuh Masīh ke wasīle se abadī zindagī meñ hukūmat kareñge.

18 Chunāñche jis tarah ek hī shaḡhs ke gunāh ke bāis sab log mujrim ṡhahre usī tarah ek hī shaḡhs ke rāst amal se wuh darwāzā khul gayā jis meñ dāḡhil ho kar sab log rāstbāz ṡhahar sakte aur zindagī pā sakte haiñ.

19 Jis tarah ek hī shaḡhs kī nāfarmānī se bahut-se log gunāhgār ban gae. Usī tarah ek hī shaḡhs kī farmāñbardārī se bahut-se log rāstbāz ban jāeñge.

20 Sharīat is lie darmiyān meñ ā gai ki ẓhilāfwarzī baṛh jāe. Lekin jahān gunāh zyādā huā wahān Allāh kā fazl is se bhī zyādā ho gayā.

21 Chunānche jis tarah gunāh maut kī sūrat meñ hukūmat kartā thā usī tarah ab Allāh kā fazl hameñ rāstbāz ẓhahrā kar hukūmat kartā hai. Yoñ hameñ apne Ẓhudāwand Īsā Masīh kī badaulat abadī zindagī hāsil hotī hai.

6

Masīh meñ Nāi Zindagī

1 Kyā is kā matlab yih hai ki ham gunāh karte raheñ tāki Allāh ke fazl meñ izāfā ho?

2 Hargiz nahīn! Ham to mar kar gunāh se lātalluq ho gae haiñ. To phir ham kis tarah gunāh ko apne āp par hukūmat karne de sakte haiñ?

3 Yā kyā āp ko mālūm nahīn ki ham sab jinheñ baptismā diyā gayā hai is se Masīh Īsā kī maut meñ shāmil ho gae haiñ?

4 Kyoñki baptisme se hameñ dafnāyā gayā aur us kī maut meñ shāmil kiyā gayā tāki ham Masīh kī tarah nāi zindagī guzāreñ, jise Bāp kī jalālī qudrat ne murdoñ meñ se zindā kiyā.

5 Chūnki is tarah ham us kī maut meñ us ke sāth paiwast ho gae haiñ is lie ham us ke jī uṭhne meñ bhī us ke sāth paiwast hoñge.

6 Kyoñki ham jānte haiñ ki hamārā purānā insān Masīh ke sāth maslūb ho gayā tāki gunāh ke qabze meñ yih jism nest ho jāe aur yoñ ham gunāh ke ḡhulām na raheñ.

7 Kyoñki jo mar gayā wuh gunāh se āzād ho gayā hai.

⁸ Aur hamārā īmān hai ki chūnki ham Masīh ke sāth mar gae haiñ is lie ham us ke sāth zindā bhī hoñge,

⁹ kyonki ham jānte haiñ ki Masīh murdoñ meñ se jī uṭhā hai aur ab kabhī nahīn maregā. Ab maut kā us par koī iḳhtiyār nahīn.

¹⁰ Marte waqt wuh hameshā ke lie gunāh kī hukūmat se nikal gayā, aur ab jab wuh dubārā zindā hai to us kī zindagī Allāh ke lie maḳhsūs hai.

¹¹ Āp bhī apne āp ko aisā samjheñ. Āp bhī mar kar gunāh kī hukūmat se nikal gae haiñ aur ab āp kī Masīh meñ zindagī Allāh ke lie maḳhsūs hai.

¹² Chunāñche gunāh āp ke fānī badan meñ hukūmat na kare. Dhyān deñ ki āp us kī burī ḳhāhishāt ke tābe na ho jāeñ.

¹³ Apne badan ke kisī bhī azu ko gunāh kī ḳhidmat ke lie pesh na kareñ, na use nārāstī kā hathiyār banane deñ. Is ke bajāe apne āp ko Allāh kī ḳhidmat ke lie pesh kareñ. Kyonki pahle āp murdā the, lekin ab āp zindā ho gae haiñ. Chunāñche apne tamām āzā ko Allāh kī ḳhidmat ke lie pesh kareñ aur unheñ rāstī ke hathiyār banane deñ.

¹⁴ Āindā gunāh āp par hukūmat nahīn karegā, kyonki āp apnī zindagī shariāt ke taht nahīn guzārte balki Allāh ke fazl ke taht.

Rāstbāzī ke Ġhulām

¹⁵ Ab sawāl yih hai, chūnki ham shariāt ke taht nahīn balki fazl ke taht haiñ to kyā is kā matlab yih hai ki hameñ gunāh karne ke lie khulā chhoṛ diyā gayā hai? Hargiz nahīn!

¹⁶ Kyā āp ko mālūm nahīn ki jab āp apne āp ko kisī ke tābe karke us ke ġhulām ban jāte haiñ to āp us mālik ke ġhulām haiñ jis ke tābe āp haiñ? Yā to gunāh āp kā mālik ban kar āp ko maut tak le jāegā, yā farmānbardārī āp kī mālikan ban kar āp ko rāstbāzī tak le jāegī.

¹⁷ Darhaqīqat āp pahle gunāh ke ġhulām the, lekin Khudā kā shukr hai ki ab āp pūre dil se usī tālīm ke tābe ho gae haiñ jo āp ke sapurd kī gaī hai.

¹⁸ Ab āp ko gunāh se āzād kar diyā gayā hai, rāstbāzī hī āp kī mālikan ban gaī hai.

¹⁹ (Āp kī fitratī kamzorī kī wajah se main ġhulāmī kī yih misāl de rahā hūn tāki āp merī bāt samajh pāen.) Pahle āp ne apne āzā ko najāsat aur bedīnī kī ġhulāmī meñ de rakhā thā jis ke natīje meñ āp kī bedīnī barhtī gaī. Lekin ab āp apne āzā ko rāstbāzī kī ġhulāmī meñ de deñ tāki āp muqaddas ban jāen.

²⁰ Jab gunāh āp kā mālik thā to āp rāstbāzī se āzād the.

²¹ Aur is kā natījā kyā thā? Jo kuchh āp ne us waqt kiyā us se āp ko āj sharm ātī hai aur us kā anjām maut hai.

²² Lekin ab āp gunāh kī ġhulāmī se āzād ho kar Allāh ke ġhulām ban gae haiñ, jis ke natīje meñ āp maḡhsūs-o-muqaddas ban jāte haiñ aur jis kā anjām abadī zindagī hai.

²³ Kyonki gunāh kā ajr maut hai jabki Allāh hamāre Khudāwand Masīh Īsā ke wasīle se hameñ abadī zindagī kī muft nemat atā kartā hai.

7

Shādī kī Misāl

¹ Bhāiyo, āp to shariyat se wāqif haiñ. To kyā āp nahīñ jānte ki shariyat us waqt tak insān par iḡhtiyār rakhtī hai jab tak wuh zindā hai?

² Shādī kī misāl leñ. Jab kisī aurat kī shādī hotī hai to shariyat us kā shauhar ke sāth bandhan us waqt tak qāym rakhtī hai jab tak shauhar zindā hai. Agar shauhar mar jāe to phir wuh is bandhan se āzād ho gaī.

³ Chunāñche agar wuh apne ḡhāwind ke jīte-jī kisī aur mard kī bīwī ban jāe to use zinākār qarār diyā jātā hai. Lekin agar us kā shauhar mar jāe to wuh shariyat se āzād huī. Ab wuh kisī dūsre mard kī bīwī bane to zinākār nahīñ ṡhahartī.

⁴ Mere bhāiyo, yih bāt āp par bhī sādīq ātī hai. Jab āp Masīh ke badan kā hissā ban gae to āp mar kar shariyat ke iḡhtiyār se āzād ho gae. Ab āp us ke sāth paiwast ho gae haiñ jise murdoñ meñ se zindā kiyā gayā tāki ham Allāh kī ḡhidmat meñ phal lāeñ.

⁵ Kyoñki jab ham apnī purānī fitrat ke taht zindagī guzārte the to shariyat hamārī gunāhālūdā raḡhbatoñ ko uksātī thī. Phir yihī raḡhbateñ hamāre āzā par asarandāz hotī thīñ aur natīje meñ ham aisā phal lāte the jis kā anjām maut hai.

⁶ Lekin ab ham mar kar shariyat ke bandhan se āzād ho gae haiñ. Ab ham shariyat kī purānī zindagī ke taht ḡhidmat nahīñ karte balki Rūhul-quds kī naī zindagī ke taht.

Sharīat aur Gunāh

⁷ Kyā is kā matlab yih hai ki sharīat khud gunāh hai? Hargiz nahīn! Bāt to yih hai ki agar sharīat mujh par mere gunāh zāhir na kartī to mujhe in kā kuchh patā na chaltā. Masalan agar sharīat na batātī, “Lālach na karnā” to mujhe darhaqīqat mālūm na hotā ki lālach kyā hai.

⁸ Lekin gunāh ne is hukm se fāydā uṭhā kar mujh meñ har tarah kā lālach paidā kar diyā. Is ke baraks jahān sharīat nahīn hotī wahān gunāh murdā hai aur aisā kām nahīn kar pātā.

⁹ Ek waqt thā jab main sharīat ke baḡhair zindagī guzartā thā. Lekin jyon hī hukm mere sāmne āyā to gunāh meñ jān ā gāī

¹⁰ aur main mar gayā. Is tarah mālūm huā ki jis hukm kā maqsad merī zindagī ko qāym rakhnā thā wuhī merī maut kā bāis ban gayā.

¹¹ Kyonki gunāh ne hukm se fāydā uṭhā kar mujhe bahkāyā aur hukm se hī mujhe mār ḍālā.

¹² Lekin sharīat khud muqaddas hai aur is ke ahkām muqaddas, rāst aur achchhe haiñ.

¹³ Kyā is kā matlab yih hai ki jo achchhā hai wuhī mere lie maut kā bāis ban gayā? Hargiz nahīn! Gunāh hī ne yih kiyā. Is achchhī chīz ko istemāl karke us ne mere lie maut paidā kar dī tāki gunāh zāhir ho jāe. Yon hukm ke zariye gunāh kī sanjīdagī had se zyādā baḡh jātī hai.

Hamāre Andar kī Kash-ma-kash

¹⁴ Ham jānte haiñ ki sharīat ruhānī hai. Lekin merī fitrat insānī hai, mujhe gunāh kī ḡhulāmī meñ bechā gayā hai.

15 Darhaqīqat main nahīn samajhtā ki kyā kartā hūn. Kyoṅki main wuh kām nahīn kartā jo karnā chāhtā hūn balki wuh jis se mujhe nafrat hai.

16 Lekin agar main wuh kartā hūn jo nahīn karnā chāhtā to zāhir hai ki main muttāfiq hūn ki sharīat achchhī hai.

17 Aur agar aisā hai to phir main yih kām ḳhud nahīn kar rahā balki gunāh jo mere andar sukūnat kartā hai.

18 Mujhe mālūm hai ki mere andar yānī merī purānī fitrat meṅ koī achchhī chīz nahīn bastī. Agarche mujh meṅ nek kām karne kā irādā to maujūd hai lekin main use amlī jāmā nahīn pahnā saktā.

19 Jo nek kām main karnā chāhtā hūn wuh nahīn kartā balki wuh burā kām kartā hūn jo karnā nahīn chāhtā.

20 Ab agar main wuh kām kartā hūn jo main nahīn karnā chāhtā to is kā matlab hai ki main ḳhud nahīn kar rahā balki wuh gunāh jo mere andar bastā hai.

21 Chunānche mujhe ek aur tarah kī sharīat kām kartī huī nazar ātī hai, aur wuh yih hai ki jab main nek kām karne kā irādā rakhtā hūn to burāī ā maujūd hotī hai.

22 Hān, apne bātin meṅ to main ḳhushī se Allāh kī sharīat ko māntā hūn.

23 Lekin mujhe apne āzā meṅ ek aur tarah kī sharīat dikhāī detī hai, aisī sharīat jo merī samajh kī sharīat ke ḳhilāf laṛ kar mujhe gunāh kī sharīat kā qaidī banā detī hai, us sharīat kā jo mere āzā meṅ maujūd hai.

24 Hāy, merī hālat kitnī burī hai! Mujhe is badan se jis kā anjām maut hai kaun chhuṛāegā?

25 Kḥudā kā shukr hai jo hamāre Kḥudāwand Īsā Masīh ke wasīle se yih kām kartā hai.

Ġharz yihī merī hālat hai, Masīh ke baġhair main Allāh kī shariyat kī kḥidmat sirf apnī samajh se kar saktā hūn jabki merī purānī fitrat gunāh kī shariyat kī ġhulām rah kar usī kī kḥidmat kartī hai.

8

Rūh meñ Zindagī

1 Ab jo Masīh Īsā meñ haiñ unheñ mujrim nahīñ ṭhahrāyā jātā.

2 Kyoñki Rūh kī shariyat ne jo hameñ Masīh meñ zindagī atā kartī hai tujhe gunāh aur maut kī shariyat se āzād kar diyā hai.

3 Mūsūwī shariyat hamārī purānī fitrat kī kamzor hālat kī wajah se hameñ na bachā sakī. Is lie Allāh ne wuh kuchh kiyā jo shariyat ke bas meñ na thā. Us ne apnā Farzand bhej diyā tāki wuh gunāhgār kā-sā jism iḳhtiyār karke hamāre gunāhoñ kā kaffārā de. Is tarah Allāh ne purānī fitrat meñ maujūd gunāh ko mujrim ṭhahrāyā

4 tāki ham meñ shariyat kā taqāzā pūrā ho jāe, ham jo purānī fitrat ke mutābiq nahīñ balki Rūh ke mutābiq chalte haiñ.

5 Jo purānī fitrat ke iḳhtiyār meñ haiñ wuh purānī soch rakhte haiñ jabki jo Rūh ke iḳhtiyār meñ haiñ wuh ruhānī soch rakhte haiñ.

6 Purānī fitrat kī soch kā anjām maut hai jabki Rūh kī soch zindagī aur salāmatī paidā kartī hai.

⁷ Purānī fitrat kī soch Allāh se dushmanī rakhtī hai. Yih apne āp ko Allāh kī sharīat ke tābe nahīn rakhtī, na hī aisā kar saktī hai.

⁸ Is lie wuh log Allāh ko pasand nahīn ā sakte jo purānī fitrat ke iḡhtiyār meñ haiñ.

⁹ Lekin āp purānī fitrat ke iḡhtiyār meñ nahīn balki Rūh ke iḡhtiyār meñ haiñ. Shart yih hai ki Rūhul-quds āp meñ basā huā ho. Agar kisī meñ Masīh kā Rūh nahīn to wuh Masīh kā nahīn.

¹⁰ Lekin agar Masīh āp meñ hai to phir āp kā badan gunāh kī wajah se murdā hai jabki Rūhul-quds āp ko rāstbāz ṭhahrāne kī wajah se āp ke lie zindagī kā bāis hai.

¹¹ Us kā Rūh āp meñ bastā hai jis ne Īsā ko murdoñ meñ se zindā kiyā. Aur chūnki Rūhul-quds āp meñ bastā hai is lie Allāh is ke zariye āp ke fānī badanoñ ko bhī Masīh kī tarah zindā karegā.

¹² Chunānche mere bhāiyo, hamārī purānī fitrat kā koī haq na rahā ki hameñ apne mutābiq zindagī guzārne par majbūr kare.

¹³ Kyoñki agar āp apnī purānī fitrat ke mutābiq zindagī guzāreñ to āp halāk ho jāenge. Lekin agar āp Rūhul-quds kī quwwat se apnī purānī fitrat ke ḡhalat kāmoñ ko nest-o-nābūd kareñ to phir āp zindā raheñge.

¹⁴ Jis kī bhī rāhnumāi Rūhul-quds kartā hai wuh Allāh kā farzand hai.

¹⁵ Kyoñki Allāh ne jo Rūh āp ko diyā hai us ne āp ko ḡhulām banā kar khaufzadā hālat meñ nahīn rakhā balki āp ko Allāh ke farzand banā diyā hai, aur usī ke zariye ham pukār kar Allāh ko “Abbā” yānī “Ai Bāp” kah sakte haiñ.

16 Rūhul-quḏs ḵhud hamārī rūh ke sāth mil kar gawāhī detā hai ki ham Allāh ke farzand haiñ.

17 Aur chūñki ham us ke farzand haiñ is lie ham wāris haiñ, Allāh ke wāris aur Masīh ke hammīrās. Kyoñki agar ham Masīh ke dukh meñ sharīk hoñ to us ke jalāl meñ bhī sharīk hoñge.

Āindā kā Jalāl

18 Mere ḵhayāl meñ hamārā maujūdā dukh us āne wāle jalāl kī nisbat kuchh bhī nahīñ jo ham par zāhir hogā.

19 Hāñ, tamām kāynāt yih deḵhne ke lie taraptī hai ki Allāh ke farzand zāhir ho jāeñ,

20 kyoñki kāynāt Allāh kī lānat ke taht ā kar fānī ho gāi hai. Yih us kī apnī nahīñ balki Allāh kī marzī thī jis ne us par yih lānat bhejī. To bhī yih ummīd dilāi gāi

21 ki ek din kāynāt ko ḵhud us kī fānī hālat kī ḡhulāmī se chhurāyā jāegā. Us waqt wuh Allāh ke farzandoñ kī jalālī āzādī meñ sharīk ho jāegī.

22 Kyoñki ham jānte haiñ ki āj tak tamām kāynāt karāhtī aur dard-e-zah meñ taraptī rahtī hai.

23 Na sirf kāynāt balki ham ḵhud bhī andar hī andar karāhte haiñ, go hameñ āne wāle jalāl kā pahlā phal Rūhul-quḏs kī sūrat meñ mil chukā hai. Ham karāhte karāhte shiddat se is intazār meñ haiñ ki yih bāt zāhir ho jāe ki ham Allāh ke farzand haiñ aur hamāre badanoñ ko najāt mile.

24 Kyoñki najāt pāte waqt hameñ yih ummīd dilāi gāi. Lekin agar wuh kuchh nazar ā chukā hotā jis kī ummīd ham rakhte to yih darhaqīqat

ummīd na hotī. Kaun us kī ummīd rakhe jo use nazar ā chukā hai?

²⁵ Lekin chūnki ham us kī ummīd rakhte haiñ jo abhī nazar nahīn āyā to lāzim hai ki ham sabar se us kā intazār karen.

²⁶ Isī tarah Rūhul-quds bhī hamārī kamzor hālat meñ hamārī madad kartā hai, kyonki ham nahīn jānte ki kis tarah munāsib duā māngeñ. Lekin Rūhul-quds ꝑhud nāqābil-e-bayān āheñ bharte hue hamārī shafā'at kartā hai.

²⁷ Aur Khudā Bāp jo tamām dilon kī tahqīq kartā hai Rūhul-quds kī soch ko jāntā hai, kyonki pāk Rūh Allāh kī marzī ke mutābiq muqaddasīn kī shafā'at kartā hai.

²⁸ Aur ham jānte haiñ ki jo Allāh se muhabbat rakhte haiñ un ke lie sab kuchh mil kar bhalāi kā bāis bantā hai, un ke lie jo us ke irāde ke mutābiq bulāe gae haiñ.

²⁹ Kyonki Allāh ne pahle se apne logon ko chun liyā, us ne pahle se unheñ is ke lie muqarrar kiyā ki wuh us ke Farzand ke hamshakl ban jāeñ aur yon Masīh bahut-se bhāiyon meñ pahlauṭhā ho.

³⁰ Lekin jinheñ us ne pahle se muqarrar kiyā unheñ us ne bulāyā bhī, jinheñ us ne bulāyā unheñ us ne rāstbāz bhī ṭhahrāyā aur jinheñ us ne rāstbāz ṭhahrāyā unheñ us ne jalāl bhī baḡhshā.

Allāh kī Masīh meñ Muhabbat

³¹ In tamām bāton ke jawāb meñ ham kyā kaheñ? Agar Allāh hamāre haq meñ hai to kaun hamāre ꝑhilāf ho saktā hai?

³² Us ne apne Farzand ko bhī dareḡh na kiyā balki use ham sab ke lie dushman ke hawāle kar diyā. Jis ne hameñ apne Farzand ko de diyā kyā

wuh hameñ us ke sāth sab kuchh muft nahīn degā?

³³ Ab kaun Allāh ke chune hue logoñ par ilzām lagāegā jab Allāh khud unheñ rāstbāz qarār detā hai?

³⁴ Kaun hameñ mujrim ṭhahrāegā jab Masīh Īsā ne hamāre lie apnī jān dī? Balki hamārī khātir is se bhī zyādā huā. Use zindā kiyā gayā aur wuh Allāh ke dahne hāth baiṭh gayā, jahān wuh hamārī shafā'at kartā hai.

³⁵ Gharz kaun hameñ Masīh kī muhabbat se judā karegā? Kyā koī musibat, tangī, izārasānī, kāl, nangāpan, khatrā yā talwār?

³⁶ Jaise kalām-e-muqaddas meñ likhā hai, “Terī khātir hameñ din-bhar maut kā sāmna karnā partā hai, log hameñ zabah hone wālī bheṛoñ ke barābar samajhte haiñ.”

³⁷ Koī bāt nahīn, kyonki Masīh hamāre sāth hai aur ham se muhabbat rakhtā hai. Us ke wasīle se ham in sab khatroñ ke rūbarū zabardast fatah pāte haiñ.

³⁸ Kyonki mujhe yaqīn hai ki hameñ us kī muhabbat se koī chīz judā nahīn kar saktī: Na maut aur na zindagī, na farishte aur na hukmrān, na hāl aur na mustaqbil, na tāqateñ,

³⁹ na nasheb aur na farāz, na koī aur maḥlūq hameñ Allāh kī us muhabbat se judā kar sakegī jo hameñ hamāre Khudāwand Masīh Īsā meñ hāsil hai.

9

Allāh aur Us kī Qaum

¹ Main Masīh meñ sach kahtā hūñ, jhūṭ nahīn boltā, aur merā zamīr bhī Rūhul-quds meñ is kī gawāhī detā hai

² ki main dil meñ apne Yahūdī hamwatanon ke lie shadīd ḡham aur musalsal dard mahsūs kartā hūñ.

³ Kāsh mere bhāī aur ḡhūnī rishtedār najāt pāen! Is ke lie main ḡhud malaūn aur Masīh se judā hone ke lie bhī taiyār hūñ.

⁴ Allāh ne unhīn ko jo Isrāīlī haiñ apne farzand banane ke lie muḡarrar kiyā thā. Unhīn par us ne apnā jalāl zāhir kiyā, unhīn ke sāth apne ahd bāndhe aur unhīn ko sharīat atā kī. Wuhī haḡīḡī ibādat aur Allāh ke wādon ke haḡdār haiñ,

⁵ wuhī Ibrāhīm aur Yāqūb kī aulād haiñ aur unhīn meñ se jismānī lihāz se Masīh āyā. Allāh kī tamjīd-o-tārīf abad tak ho jo sab par hukūmat kartā hai! Āmīn.

⁶ Kahne kā matlab yih nahīn ki Allāh apnā wādā pūrā na kar sakā. Bāt yih nahīn hai balki yih ki wuh sab haḡīḡī Isrāīlī nahīn haiñ jo Isrāīlī qaum se haiñ.

⁷ Aur sab Ibrāhīm kī haḡīḡī aulād nahīn haiñ jo us kī nasl se haiñ. Kyonki Allāh ne kalām-e-muḡaddas meñ Ibrāhīm se farmāyā, “Terī nasl Is’hāḡ hī se ḡāym raheḡī.”

⁸ Chunānche lāzim nahīn ki Ibrāhīm kī tamām fitratī aulād Allāh ke farzand hon balki sirf wuhī Ibrāhīm kī haḡīḡī aulād samjhe jāte haiñ jo Allāh ke wāde ke mutābiḡ us ke farzand ban gae haiñ.

⁹ Aur wādā yih thā, “Muḡarrarā waḡt par main wāpas āūngā to Sārā ke beṡā hogā.”

¹⁰ Lekin na sirf Sārā ke sāth aisā huā balki

Is'hāq kī bīwī Ribqā ke sāth bhī. Ek hī mard yānī hamāre bāp Is'hāq se us ke jurwān bachche paidā hue.

¹¹ Lekin bachche abhī paidā nahīn hue the na unhoñ ne koī nek yā burā kām kiyā thā ki māñ ko Allāh se ek paighām milā. Is paighām se zāhir hotā hai ki Allāh logon ko apne irāde ke mutābiq chun letā hai.

¹² Aur us kā yih chunāo un ke nek āmāl par mabnī nahīn hotā balki us ke bulāwe par. Paighām yih thā, “Baṛā chhoṭe kī ḳhidmat karegā.”

¹³ Yih bhī kalām-e-muqaddas meñ likhā hai, “Yāqūb mujhe pyārā thā, jabki Esau se main mutanaffir rahā.”

¹⁴ Kyā is kā matlab yih hai ki Allāh be'insāf hai? Hargiz nahīn!

¹⁵ Kyonki us ne Mūsā se kahā, “Main jis par mehrbān honā chāhūñ us par mehrbān hotā hūñ aur jis par rahm karnā chāhūñ us par rahm kartā hūñ.”

¹⁶ Chunāñche sab kuchh Allāh ke rahm par hī mabnī hai. Is meñ insān kī marzī yā koshish kā koī daḳhl nahīn.

¹⁷ Yoñ Allāh apne kalām meñ Misr ke bādshāh Firaun se muḳhātib ho kar farmātā hai, “Main ne tujhe is lie barpā kiyā hai ki tujh meñ apnī qudrat kā izhār karūñ aur yoñ tamām duniyā meñ mere nām kā prachār kiyā jāe.”

¹⁸ Ġharz, yih Allāh hī kī marzī hai ki wuh kis par rahm kare aur kis ko saḳht kar de.

Allāh kā Ġhazab aur Rahm

19 Shāyad koī kahe, “Agar yih bāt hai to phir Allāh kis tarah ham par ilzām lagā saktā hai jab ham se ḡhaliyān hotī haiñ? Ham to us kī marzī kā muḡābalā nahīn kar sakte.”

20 Yih na kaheñ. Āp insān hote hue kaun haiñ ki Allāh ke sāth bahs-mubāhasā kareñ? Kyā jis ko tashkīl diyā gayā hai wuh tashkīl dene wāle se kahtā hai, “Tū ne mujhe is tarah kyon banā diyā?”

21 Kyā kumhār kā haq nahīn hai ki gāre ke ek hī launde se muḡhtalif qism ke bartan banāe, kuchh bā-izzat istemāl ke lie aur kuchh zillatāmez istemāl ke lie?

22 Yih bāt Allāh par bhī sādiq ātī hai. Go wuh apnā ḡhazab nāzil karnā aur apnī qudrat zāhir karnā chāhtā thā, lekin us ne baḡe sabr-o-tahammul se wuh bartan bardāshht kie jin par us kā ḡhazab ānā hai aur jo halākat ke lie taiyār kie gae haiñ.

23 Us ne yih is lie kiyā tāki apnā jalāl kasrat se un bartanon par zāhir kare jin par us kā fazl hai aur jo pahle se jalāl pāne ke lie taiyār kie gae haiñ.

24 Aur ham un meñ se haiñ jin ko us ne chun liyā hai, na sirf Yahūdiyon meñ se balki Ḡhairyahūdiyon meñ se bhī.

25 Yoñ wuh Ḡhairyahūdiyon ke nāte se Hosea kī kitāb meñ farmātā hai,

“Maiñ use ‘Merī Qaum’ kahūngā
jo merī qaum na thī,
aur use ‘Merī Pyārī’ kahūngā
jo mujhe pyārī na thī.”

26 Aur “Jahān unheñ batāyā gayā ki ‘Tum merī qaum nahīn’ wahān wuh ‘Zindā Ḳhudā ke Farzand’ kahlāeñge.”

27 Aur Yasāyāh Nabī Isrāīl ke bāre meñ pukārtā hai, “Go Isrāīlī sāhil par kī ret jaise beshumār kyoñ na hoñ to bhī sirf ek bache hue hisse ko najāt milegī.

28 Kyoñki Rab apnā farmān mukammal taur par aur tezī se duniyā meñ pūrā karegā.”

29 Yasāyāh ne yih bāt ek aur peshgoī meñ bhī kī, “Agar Rabbul-afwāj hamārī kuchh aulād zindā na chhoṛtā to ham Sadūm kī tarah miṭ jāte, hamārā Amūrā jaisā satyānās ho jātā.”

Isrāīl ke lie Paulus kī Duā

30 Is se ham kyā kahnā chāhte haiñ? Yih ki go Ḡhairyahūdī rāstbāzī kī talāsh meñ na the to bhī unheñ rāstbāzī hāsil huī, aisī rāstbāzī jo imān se paidā huī.

31 Is ke baraks Isrāīliyoñ ko yih hāsil na huī, hālāñki wuh aisī shariāt kī talāsh meñ rahe jo unheñ rāstbāz ṭhahrāe.

32 Is kī kyā wajah thī? Yih ki wuh apnī tamām koshishoñ meñ imān par inhisār nahīn karte the balki apne nek āmāl par. Unhoñ ne rāh meñ paṛe patthar se ṭhokar khāī.

33 Yih bāt kalām-e-muqaddas meñ likhī bhī hai,

“Dekho maiñ Siyyūn meñ ek patthar rakh detā hūñ

jo ṭhokar kā bāis banegā,

ek chaṭṭān jo ṭhes lagne kā sabab hogī.

Lekin jo us par imān lāegā
use sharmindā nahīn kiyā jāegā.”

10

¹ Bhāiyo, merī dilī ārzū aur merī Allāh se duā yih hai ki Isrāīliyon ko najāt mile.

² Main is kī tasdīq kar saktā hūn ki wuh Allāh kī ḡhairat rakhte haiñ. Lekin is ḡhairat ke pīchhe ruhānī samajh nahīn hotī.

³ Wuh us rāstbāzī se nāwāqif rahe haiñ jo Allāh kī taraf se hai. Is kī bajāe wuh apnī zātī rāstbāzī qāym karne kī koshish karte rahe haiñ. Yoñ unhoñ ne apne āp ko Allāh kī rāstbāzī ke tābe nahīn kiyā.

⁴ Kyonki Masīh meñ shariyat kā maqsad pūrā ho gayā, hāñ wuh anjām tak pahuñch gaī hai. Chunāñche jo bhī Masīh par imān rakhtā hai wuhī rāstbāz ṭhahartā hai.

Sab ke lie Rāstbāzī

⁵ Mūsā ne us rāstbāzī ke bāre meñ likhā jo shariyat se hāsil hotī hai, “Jo shaḡhs yoñ karegā wuh jītā rahegā.”

⁶ Lekin jo rāstbāzī imān se hāsil hotī hai wuh kahtī hai, “Apne dil meñ na kahnā ki ‘Kaun āsmān par charhegā?’ (tāki Masīh ko nīche le āe).

⁷ Yih bhī na kahnā ki ‘Kaun Pātāl meñ utregā?’ (tāki Masīh ko murdoñ meñ se wāpas le āe).”

⁸ To phir kyā karnā chāhie? Imān kī rāstbāzī farmātī hai, “Yih kalām tere qarīb balki tere muñh aur dil meñ maujūd hai.” Kalām se murād imān kā wuh paighām hai jo ham sunāte haiñ.

⁹ Yānī yih ki agar tū apne muñh se iqrār kare ki Īsā Ḳhudāwand hai aur dil se imān lāe ki Allāh ne use murdoñ meñ se zindā kar diyā to tujhe najāt milegī.

¹⁰ Kyoñki jab ham dil se imān lāte haiñ to Allāh hameñ rāstbāz qarār detā hai, aur jab ham apne muñh se iqrār karte haiñ to hameñ najāt milti hai.

¹¹ Yoñ kalām-e-muqaddas farmātā hai, “Jo bhī us par imān lāe use sharmindā nahīñ kiyā jāegā.”

¹² Is meñ koī farq nahīñ ki wuh Yahūdī ho yā Ġhairyahūdī. Kyoñki sab kā ek hī Ḳhudāwand hai, jo faiyāzī se har ek ko detā hai jo use pukārtā hai.

¹³ Kyoñki “Jo bhī Ḳhudāwand kā nām legā najāt pāegā.”

¹⁴ Lekin wuh kis tarah use pukār sakeñge agar wuh us par kabhī imān nahīñ lāe? Aur wuh kis tarah us par imān lā sakte haiñ agar unhoñ ne kabhī us ke bāre meñ sunā nahīñ? Aur wuh kis tarah us ke bāre meñ sun sakte haiñ agar kisī ne unheñ yih paighām sunāyā nahīñ?

¹⁵ Aur sunāne wāle kis tarah dūsroñ ke pās jāeñge agar unheñ bhejā na gayā? Is lie kalām-e-muqaddas farmātā hai, “Un ke qadam kitne pyāre haiñ jo ḳhushḳhabrī sunāte haiñ.”

¹⁶ Lekin sab ne Allāh kī yih ḳhushḳhabrī qabūl nahīñ kī. Yoñ Yasāyāh Nabī farmātā hai, “Ai Rab, kaun hamāre paighām par imān lāyā?”

¹⁷ Ġharz, imān paighām sunane se paidā hotā hai, yānī Masīh kā kalām sunane se.

18 To phir sawāl yih hai ki kyā Isrāīliyon ne yih paighām nahīn sunā? Unhon ne ise zarūr sunā. Kalām-e-muqaddas meñ likhā hai,

“Un kī āwāz nikal kar pūrī duniyā meñ sunāī dī,

un ke alfāz duniyā kī intahā tak pahuñch gae.”

19 To kyā Isrāīl ko is bāt kī samajh na āī? Nahīn, use zarūr samajh āī. Pahle Mūsā is kā jawāb detā hai,

“Maiñ khud hī tumheñ ghairat dilāūngā,
ek aisī qaum ke zariye jo haqīqat meñ qaum nahīn hai.

Ek nādān qaum ke zariye maiñ tumheñ ghussā dilāūngā.”

20 Aur Yasāyāh Nabī yih kahne kī jurrat kartā hai,

“Jo mujhe talāsh nahīn karte the
unheñ maiñ ne mujhe pāne kā mauqā diyā,
jo mere bāre meñ dariyāft nahīn karte the
un par maiñ zāhir huā.”

21 Lekin Isrāīl ke bāre meñ wuh farmātā hai,
“Din-bhar maiñ ne apne hāth phailāe rakhe
tāki ek nāfarmān aur sarkash qaum kā istiqbāl
karūñ.”

11

Isrāīl par Allāh kā Rahm

1 To kyā is kā yih matlab hai ki Allāh ne apnī qaum ko radd kiyā hai? Hargiz nahīn! Maiñ to khud Isrāīlī hūñ. Ibrāhīm merā bhī bāp hai, aur maiñ Binyamīn ke qabile kā hūñ.

2 Allāh ne apnī qaum ko pahle se chun liyā thā. Wuh kis tarah use radd karegā! Kyā āp ko

mālūm nahīn ki kalām-e-muqaddas meñ Iliyās Nabī ke bāre meñ kyā likhā hai? Iliyās ne Allāh ke sāmne Isrāīlī qaum kī shikāyat karke kahā,

³ “Ai Rab, unhoñ ne tere nabiyōñ ko qatl kiyā aur terī qurbāngāhoñ ko girā diyā hai. Maiñ akelā hī bachā hūñ, aur wuh mujhe bhī mār ḍālne ke darpai haiñ.”

⁴ Is par Allāh ne use kyā jawāb diyā? “Maiñ ne apne lie 7,000 mardoñ ko bachā liyā hai jinhoñ ne apne ghuṭne Bāl Dewatā ke sāmne nahīn ṭeke.”

⁵ Āj bhī yihī hālat hai. Isrāīl kā ek chhoṭā hissā bach gayā hai jise Allāh ne apne fazl se chun liyā hai.

⁶ Aur chūnki yih Allāh ke fazl se huā hai is lie yih un kī apnī koshishoñ se nahīn huā. Warnā fazl fazl hī na rahtā.

⁷ Gharz, jis chīz kī talāsh meñ Isrāīl rahā wuh pūrī qaum ko hāsil nahīn huī balki sirf us ke ek chune hue hisse ko. Bāqī sab ko fazl ke bāre meñ behis kar diyā gayā,

⁸ jis tarah kalām-e-muqaddas meñ likhā hai,
“Āj tak Allāh ne unheñ aisī hālat meñ rakhā hai

ki un kī rūh madhosh hai,
un kī āñkheñ dekh nahīn saktīñ
aur un ke kān sun nahīn sakte.”

⁹ Aur Dāūd farmātā hai,
“Un kī mez un ke lie phandā aur jāl ban jāe,
is se wuh ṭhokar khā kar apne ḡhalat kāmoñ
kā muāwazā pāeñ.

¹⁰ Un kī āñkheñ tārīk ho jāeñ tāki wuh dekh na sakeñ,
un kī kamr hameshā jhukī rahe.”

11 To kyā Allāh kī qaum ṭhokar khā kar yon gir gaī ki kabhī bahāl nahīn hogī? Hargiz nahīn! Us kī khatāon kī wajah se Allāh ne Ġhairyahūdiyon ko najāt pāne kā mauqā diyā tāki Isrāīlī Ġhairat khāen.

12 Yon Yahūdiyon kī khatāen duniyā ke lie bharpūr barkat kā bāis ban gaīn, aur un kā nuqsān Ġhairyahūdiyon ke lie bharpūr barkat kā bāis ban gayā. To phir yih barkat kitnī aur zyādā hogī jab Yahūdiyon kī pūrī tādād is meñ shāmil ho jāegī!

Ġhairyahūdiyon kī Najāt

13 Āp ko jo Ġhairyahūdī haiñ main yih batātā hūñ, Allāh ne mujhe Ġhairyahūdiyon ke lie rasūl banāyā hai, is lie main apnī is k̄hidmat par zor detā hūñ.

14 Kyonki main chāhtā hūñ ki merī qaum ke log yih dekh kar Ġhairat khāen aur un meñ se kuchh bach jāen.

15 Jab unheñ radd kiyā gayā to bāqī duniyā kī Allāh ke sāth sulah ho gaī. To phir kyā hogā jab unheñ dubārā qabūl kiyā jāegā? Yih murdon meñ se jī uṭhne ke barābar hogā!

16 Jab āp fasal ke pahle āṭe se roṭī banā kar Allāh ke lie maḵsūs-o-muqaddas karte haiñ to bāqī sārā āṭā bhī maḵsūs-o-muqaddas hai. Aur jab darakht kī jareñ muqaddas haiñ to us kī shākheñ bhī muqaddas haiñ.

17 Zaitūn ke darakht kī kuchh shākheñ toṛ dī gaī haiñ aur un kī jagah janglī zaitūn ke darakht kī ek shākh paiwand kī gaī hai. Āp Ġhairyahūdī is janglī shākh se mutābiqat rakhte haiñ. Jis

tarah yih dūsre daraḳht kī jaṛ se ras aur taqwiyaṭ pātī hai usī tarah āp bhī Yahūdī qaum kī ruhānī jaṛ se taqwiyaṭ pāte haiñ.

¹⁸ Chunāñche āp kā dūsri shāḳhoñ ke sāmne sheḳhī mārne kā haq nahīñ. Aur agar āp sheḳhī māreñ to yih ḳhayāl kareñ ki āp jaṛ ko qāym nahīñ rakhte balki jaṛ āp ko.

¹⁹ Shāyad āp is par etarāz kareñ, “Hāñ, lekin dūsri shāḳheñ toṛī gaīñ tāki maiñ paiwand kiyā jāūñ.”

²⁰ Beshak, lekin yād rakheñ, dūsri shāḳheñ is lie toṛī gaīñ ki wuh imān nahīñ rakhtī thīñ aur āp is lie un kī jagah lage haiñ ki āp imān rakhte haiñ. Chunāñche apne āp par faḳhr na kareñ balki ḳhauf rakheñ.

²¹ Allāh ne aslī shāḳheñ bachne na dīñ. Agar āp is tarah kī harkateñ kareñ to kyā wuh āp ko chhoṛ degā?

²² Yahāñ hameñ Allāh kī mehrbānī aur saḳhtī nazar ātī hai—jo gir gae haiñ un ke silsile meñ us kī saḳhtī, lekin āp ke silsile meñ us kī mehrbānī. Aur yih mehrbānī rahegī jab tak āp us kī mehrbānī se lipṭe raheñge. Warnā āp ko bhī daraḳht se kāṭ ḍālā jāegā.

²³ Aur agar Yahūdī apne kufr se bāz aeñ to un kī paiwandkārī dubārā daraḳht ke sāth kī jāegī, kyonki Allāh aisā karne par qādir hai.

²⁴ Āḳhir āp ḳhud qudratī taur par zaitūn ke janglī daraḳht kī shāḳh the jise Allāh ne toṛ kar qudratī qawānīn ke ḳhilāf zaitūn ke asal daraḳht par lagāyā. To phir wuh kitnī zyādā āsānī se Yahūdiyon kī toṛī gaī shāḳheñ dubārā un ke apne daraḳht meñ lagā degā!

Allāh kā Rahm Sab Par

²⁵ Bhāiyo, main chāhtā hūn ki āp ek bhed se wāqif ho jāeñ, kyonki yih āp ko apne āp ko dānā samajhne se bāz rakhegā. Bhed yih hai ki Isrāil kā ek hissā Allāh ke fazl ke bāre meñ behis ho gayā hai, aur us kī yih hālat us waqt tak rahegī jab tak Ġhairyahūdiyon kī pūrī tādād Allāh kī bādshāhī meñ dākḥhil na ho jāe.

²⁶ Phir pūrā Isrāil najāt pāegā. Yih kalām-e-muqaddas meñ bhī likhā hai,

“Chhurāne wālā Siyyūn se āegā.

Wuh bedīnī ko Yāqūb se haṭā degā.

²⁷ Aur yih merā un ke sāth ahd hogā jab main un ke gunāhoñ ko un se dūr karūnga.”

²⁸ Chūnki Yahūdī Allāh kī ḡhushḡhabrī qabūl nahīn karte is lie wuh Allāh ke dushman haiñ, aur yih bāt āp ke lie fāyde kā bāis ban gaī hai. To bhī wuh Allāh ko pyāre haiñ, is lie ki us ne un ke bāpdādā Ibrāhīm, Is'hāq aur Yāqūb ko chun liyā thā.

²⁹ Kyonki jab bhī Allāh kisī ko apnī nematoñ se nawāz kar bulātā hai to us kī yih nemateñ aur bulāwe kabhī nahīn miṭne kī.

³⁰ Māzī meñ Ġhairyahūdī Allāh ke tābe nahīn the, lekin ab Allāh ne āp par Yahūdiyon kī nāfarmānī kī wajah se rahm kiyā hai.

³¹ Ab is ke ulaṭ hai ki Yahūdī ḡhud āp par kie gae rahm kī wajah se Allāh ke tābe nahīn haiñ, aur lāzim hai ki Allāh un par bhī rahm kare.

³² Kyonki us ne sab ko nāfarmānī ke qaidī banā diyā hai tāki sab par rahm kare.

Allāh kī Tamjīd

³³ Wāh! Allāh kī daulat, hikmat aur ilm kyā hī gahrā hai. Kaun us ke faislon kī tah tak pahuñch saktā hai! Kaun us kī rāhon kā khoj lagā saktā hai!

³⁴ Kalām-e-muqaddas yon farmātā hai,

“Kis ne Rab kī soch ko jānā?

Yā kaun itnā ilm rakhtā hai

kī wuh use mashwarā de?

³⁵ Kyā kisī ne kabhī use kuchh diyā

kī use is kā muāwazā denā parē?”

³⁶ Kyonki sab kuchh usī ne paidā kiyā hai, sab kuchh usī ke zariye aur usī ke jalāl ke lie qāym hai. Usī kī tamjīd abad tak hotī rahe! Āmīn.

12

Pūrī Zindagī Allāh kī Khidmat Meñ

¹ Bhāiyo, Allāh ne āp par kitnā rahm kiyā hai! Ab zarūrī hai ki āp apne badanon ko Allāh ke lie makhsūs karen, ki wuh ek aisī zindā aur muqaddas qurbānī ban jāen jo use pasand āe. Aisā karne se āp us kī māqūl ibādat karenge.

² Is duniyā ke sānche meñ na dhal jāen balki Allāh ko āp kī soch kī tajdīd karne deñ tāki āp wuh shakl-o-sūrat apnā sakeñ jo use pasand hai. Phir āp Allāh kī marzī ko pahchān sakeñge, wuh kuchh jo achchhā, pasandīdā aur kāmīl hai.

³ Us rahm kī binā par jo Allāh ne mujh par kiyā main āp meñ se har ek ko hidāyat detā hūñ ki apnī haqīqī haisiyat ko jān kar apne āp ko is se zyādā na samjheñ. Kyonki jis paimāne se Allāh ne har ek ko īmān baḥshā hai usī ke mutābiq wuh samajhdārī se apnī haqīqī haisiyat ko jān le.

⁴ Hamāre ek hī jism meñ bahut-se āzā haiñ, aur har ek azu kā farq farq kām hotā hai.

⁵ Isī tarah go ham bahut haiñ, lekin Masīh meñ ek hī badan haiñ, jis meñ har azu dūsron ke sāth jurā huā hai.

⁶ Allāh ne apne fazl se har ek ko muḁhtalif nematoñ se nawāzā hai. Agar āp kī nemat nabuwwat karnā hai to apne imān ke mutābiq nabuwwat karen.

⁷ Agar āp kī nemat ḁhidmat karnā hai to ḁhidmat karen. Agar āp kī nemat tālīm denā hai to tālīm den.

⁸ Agar āp kī nemat hauslā-afzāi karnā hai to hauslā-afzāi karen. Agar āp kī nemat dūsron kī zarūriyāt pūrī karnā hai to ḁhulūdilī se yihī karen. Agar āp kī nemat rāhnumāi karnā hai to sargarmī se rāhnumāi karen. Agar āp kī nemat rahm karnā hai to ḁhushī se rahm karen.

⁹ Āp kī muhabbat mahz dikhāwe kī na ho. Jo kuchh burā hai us se nafrat karen aur jo kuchh achchhā hai us ke sāth lipṭe raheñ.

¹⁰ Āp kī ek dūsre ke lie barādarānā muhabbat sargarm ho. Ek dūsre kī izzat karne meñ āp ḁhud pahlā ḁadam uṭhāeñ.

¹¹ Āp kā josh ḁhilā na paṛ jāe balki ruhānī sargarmī se ḁhudāwand kī ḁhidmat karen.

¹² Ummīd meñ ḁhush, musībat meñ sābitḁadam aur duā meñ lage raheñ.

¹³ Jab muḁaddasīn zarūratmand haiñ to un kī madad karne meñ sharīk hoñ. Mehmān-nawāzī meñ lage raheñ.

¹⁴ Jo āp ko īzā pahuñchāeñ un ko barkat den. Un par lānat mat karen balki barkat chāheñ.

¹⁵ Ḳhushī manāne wāloñ ke sāth ḳhushī manāeñ aur rone wāloñ ke sāth roeñ.

¹⁶ Ek dūsre ke sāth achchhe tālluqāt rakheñ. Ūñchī soch na rakheñ balki dabe huoñ se rifāqat rakheñ. Apne āp ko dānā mat samjheñ.

¹⁷ Agar koī āp se burā sulūk kare to badle meñ us se burā sulūk na karnā. Dhyān rakheñ ki jo kuchh sab kī nazar meñ achchhā hai wuhī amal meñ lāeñ.

¹⁸ Apnī taraf se pūrī koshish kareñ ki jahān tak mumkin ho sab ke sāth mel-milāp rakheñ.

¹⁹ Azīzo, intaqām mat leñ balki Allāh ke ḡhazab ko badlā lene kā mauqā deñ. Kyoñki kalām-e-muqaddas meñ likhā hai, “Rab farmātā hai, intaqām lenā merā hī kām hai, main hī badlā lūngā.”

²⁰ Is ke bajāe “Agar terā dushman bhūkā ho to use khānā khilā, agar pyāsā ho to pānī pilā. Kyoñki aisā karne se tū us ke sar par jalte hue koeloñ kā dher lagāegā.”

²¹ Apne par burāi ko ḡhālib na āne deñ balki bhalāi se āp burāi par ḡhālib āeñ.

13

Riāyā ke Farāyz

¹ Har shaḳhs iḳhtiyār rakhne wāle hukmrānoñ ke tābe rahe, kyoñki tamām iḳhtiyār Allāh kī taraf se hai. Jo iḳhtiyār rakhte haiñ unheñ Allāh kī taraf se muqarrar kiyā gayā hai.

² Chunāñche jo hukmrān kī muḳhālafat kartā hai wuh Allāh ke farmān kī muḳhālafat kartā aur yoñ apne āp par Allāh kī adālat lātā hai.

³ Kyoñki hukmrān un ke lie khauf kā bāis nahīn hote jo sahīh kām karte haiñ balki un ke lie jo ghalat kām karte haiñ. Kyā āp hukmrān se khauf khāe baḡhair zindagī guzārnā chāhte haiñ? To phir wuh kuchh karen jo achchhā hai to wuh āp ko shābāsh degā.

⁴ Kyoñki wuh Allāh kā kḡhādim hai jo āp kī behtarī ke lie kḡhidmat kartā hai. Lekin agar āp ghalat kām karen to ḡdareñ, kyoñki wuh apnī talwār ko kḡhāmakḡhāh thāme nahīn rakhtā. Wuh Allāh kā kḡhādim hai aur us kā ḡhazab ghalat kām karne wāle par nāzil hotā hai.

⁵ Is lie lāzim hai ki āp hukūmat ke tābe raheñ, na sirf sazā se bachne ke lie balki is lie bhī ki āp ke zamīr par dāḡh na lage.

⁶ Yihī wajah hai ki āp ṡaiks adā karte haiñ, kyoñki sarkārī mulāzim Allāh ke kḡhādim haiñ jo is kḡhidmat ko saranjām dene meñ lage rahte haiñ.

⁷ Chunāñche har ek ko wuh kuchh deñ jo us kā haq hai, ṡaiks lene wāle ko ṡaiks aur kaṡtam ḡyūṡī lene wāle ko kaṡtam ḡyūṡī. Jis kā khauf rakhnā āp par farz hai us kā khauf māneñ aur jis kā ehtirām karnā āp par farz hai us kā ehtirām karen.

Ek Dūsre ke lie Farāyz

⁸ Kisī ke bhī qarzdār na raheñ. Sirf ek qarz hai jo āp kabhī nahīn utār sakte, ek dūsre se muhabbat rakhne kā qarz. Yih karte raheñ kyoñki jo dūsroñ se muhabbat rakhtā hai us ne sharīat ke tamām taqāze pūre kie haiñ.

⁹ Masalan sharīat meñ likhā hai, “Qatl na karnā, zinā na karnā, chorī na karnā, lālāch na

karnā.” Aur dīgar jitne ahkām haiñ is ek hī hukm meñ samāe hue haiñ ki “Apne paṛosī se waisī muhabbat rakhnā jaisī tū apne āp se rakhtā hai.”

¹⁰ Jo kisī se muhabbat rakhtā hai wuh us se ḡhalat sulūk nahīñ kartā. Yoñ muhabbat shariyat ke tamām taqāze pūre kartī hai.

¹¹ Aisā karnā lāzim hai, kyonki āp khud is waqt kī ahmiyat ko jānte haiñ ki nīnd se jāg uṭhne kī ghaṛī ā chukī hai. Kyonki jab ham īmān lāe the to hamārī najāt itnī qarīb nahīñ thī jitnī ki ab hai.

¹² Rāt dhalne wālī hai aur din nikalne wālā hai. Is lie āeñ, ham tārīkī ke kām gande kapṛon kī tarah utār kar nūr ke hathiyār bāndh leñ.

¹³ Ham sharīf zindagī guzāreñ, aise logoñ kī tarah jo din kī raushnī meñ chalte haiñ. Is lie lāzim hai ki ham in chīzon se bāz raheñ: badmastoñ kī rangraliyon aur sharābnoshī se, zinākārī aur aiyāshī se, aur jhagaṛe aur hasad se.

¹⁴ Is ke bajāe Khudāwand Īsā Masīh ko pahan leñ aur apnī purānī fitrat kī parwarish yoñ na kareñ ki gunāhālūdā khāhishāt bedār ho jāeñ.

14

Ek Dūsre ko Mujrim Mat Thahrānā

¹ Jis kā īmān kamzor hai use qabūl kareñ, aur us ke sāth bahs-mubāhasā na kareñ.

² Ek kā īmān to use har chīz khāne kī ijāzat detā hai jabki kamzor īmān rakhne wālā sirf sabziyān khātā hai.

³ Jo sab kuchh khātā hai wuh use haqīr na jāne jo yih nahīn kar saktā. Aur jo yih nahīn kar saktā wuh use mujrim na ṭhahrāe jo sab kuchh khātā hai, kyoṅki Allāh ne use qabūl kiyā hai.

⁴ Āp kaun haiṅ ki kisī aur ke ḡhulām kā faislā karen? Us kā apnā mālik faislā karegā ki wuh khaṛā rahe yā gir jāe. Aur wuh zarūr khaṛā rahegā, kyoṅki Ḳhudāwand use qāym rakhne par qādir hai.

⁵ Kuchh log ek din ko dūsre dinon kī nisbat zyādā aham qarār dete haiṅ jabki dūsre tamām dinon kī ahmiyat barābar samajhte haiṅ. Āp jo bhī kḡhayāl rakheṅ, har ek use pūre yaqīn ke sāth rakhe.

⁶ Jo ek din ko kḡhās qarār detā hai wuh is se Ḳhudāwand kī tāzīm karnā chāhtā hai. Isī tarah jo sab kuchh khātā hai wuh is se Ḳhudāwand ko jalāl denā chāhtā hai. Yih is se zāhir hotā hai ki wuh is ke lie Ḳhudā kā shukr kartā hai. Lekin jo kuchh khānon se parhez kartā hai wuh bhī Ḳhudā kā shukr karke is se us kī tāzīm karnā chāhtā hai.

⁷ Bāt yih hai ki ham meṅ se koī nahīn jo sirf apne wāste zindagī guzārtā hai aur koī nahīn jo sirf apne wāste martā hai.

⁸ Agar ham zindā haiṅ to is lie ki Ḳhudāwand ko jalāl deṅ, aur agar ham mareṅ to is lie ki ham Ḳhudāwand ko jalāl deṅ. Ḡharz ham Ḳhudāwand hī ke haiṅ, kḡhāh zindā hoṅ yā murdā.

⁹ Kyoṅki Masīh isī maqsad ke lie muā aur jī uṭhā ki wuh murdon aur zindon donoṅ kā mālik ho.

10 To phir āp jo sirf sabzī khāte haiñ apne bhāi ko mujrim kyon̄ ṭhahrāte haiñ? Aur āp jo sab kuchh khāte haiñ apne bhāi ko haqīr kyon̄ jānte haiñ? Yād rakheñ ki ek din ham sab Allāh ke taḳht-e-adālat ke sāmne khare hoñge.

11 Kalām-e-muqaddas meñ yihī likhā hai, Rab farmātā hai, “Merī hayāt kī qasam, har ghuṭnā mere sāmne jhukegā aur har zabān Allāh kī tamjīd karegī.”

12 Hāñ, ham meñ se har ek ko Allāh ke sāmne apnī zindagī kā jawāb denā paregā.

Dūsron̄ ke lie Girne kā Bāis na Banānā

13 Chunāñche aēñ, ham ek dūsre ko mujrim na ṭhahrāēñ. Pūre azm ke sāth is kā ḳhayāl rakheñ ki āp apne bhāi ke lie ṭhokar khāne yā gunāh meñ girne kā bāis na baneñ.

14 Mujhe Ḳhudāwand Masīh meñ ilm aur yaqīn hai ki koī bhī khānā bazāt-e-ḳhud nāpāk nahīn hai. Lekin jo kisī khāne ko nāpāk samajhtā hai us ke lie wuh khānā nāpāk hī hai.

15 Agar āp apne bhāi ko apne kisī khāne ke bāis pareshān kar rahe haiñ to āp muhabbat kī rūh meñ zindagī nahīn guzār rahe. Apne bhāi ko apne khāne se halāk na kareñ. Yād rakheñ ki Masīh ne us ke lie apnī jān dī hai.

16 Aisā na ho ki log us achchhī chīz par kufr bakeñ jo āp ko mil gāi hai.

17 Kyon̄ki Allāh kī bādshāhī khāne-pīne kī chīzon̄ par qāym nahīn hai balki rāstbāzī, sulah-salāmātī aur Rūhul-quḏs meñ ḳhushī par.

18 Jo yon̄ Masīh kī ḳhidmat kartā hai wuh Allāh ko pasand aur insānon̄ ko manzūr hai.

19 Chunānche āeñ, ham pūrī jidd-o-jahd ke sāth wuh kuchh karne kī koshish karen̄ jo sulah-salāmatī aur ek dūsre kī ruhānī tāmīr-o-taraqqī kā bāis hai.

20 Allāh kā kām kisī khāne kī khātir barbād na karen̄. Har khānā pāk hai, lekin agar āp kuchh khāte haiñ jis se dūsre ko ṭhes lage to yih ḡhalat hai.

21 Behtar yih hai ki na āp gosht khāeñ, na mai pieñ aur na koī aur qadam uṭhāeñ jis se āp kā bhāi ṭhokar khāe.

22 Jo bhī īmān āp is nāte se rakhte haiñ wuh āp aur Allāh tak mahdūd rahe. Mubārak hai wuh jo kisī chīz ko jāyz qarār de kar apne āp ko mujrim nahīñ ṭhahrātā.

23 Lekin jo shak karte hue koī khānā khātā hai use mujrim ṭhahrāyā jātā hai, kyonki us kā yih amal īmān par mabnī nahīñ hai. Aur jo bhī amal īmān par mabnī nahīñ hotā wuh gunāh hai.

15

Burdbārī

1 Ham tāqatwaron̄ kā farz hai ki kamzoron̄ kī kamzoriyāñ bardāsht karen̄. Ham sirf apne āp ko khush karne kī khātir zindagī na guzāreñ

2 balki har ek apne parosī ko us kī behtarī aur ruhānī tāmīr-o-taraqqī ke lie khush kare.

3 Kyonki Masīh ne bhī khud ko khush rakhne ke lie zindagī nahīñ guzārī. Kalām-e-muqaddas meñ us ke bāre meñ yihī likhā hai, “Jo tujhe gāliyāñ dete haiñ un kī gāliyāñ mujh par ā gāi haiñ.”

⁴ Yih sab kuchh hamen hamārī nasīhat ke lie likhā gayā tāki ham sābitqadmī aur kalām-e-muqaddas kī hauslā-afzā bāton se ummīd pāen.

⁵ Ab sābitqadmī aur hauslā dene wālā Ḳhudā āp ko taufīq de ki āp Masīh Īsā kā namūnā apnā kar yagāngat kī rūh men ek dūsre ke sāth zindagī guzāren.

⁶ Tab hī āp mil kar ek hī āwāz ke sāth Ḳhudā, hamāre Ḳhudāwand Īsā Masīh ke Bāp ko jalāl de sakeᅅge.

Ḡhairyahūdīyon ke lie Ḳhushḵhabrī

⁷ Chunānche jis tarah Masīh ne āp ko qabūl kiyā hai usī tarah ek dūsre ko bhī qabūl karen tāki Allāh ko jalāl mile.

⁸ Yād rakheᅅ ki Masīh Allāh kī sadāqat kā izhār karke Yahūdīyon kā ḵhādīm banā tāki un wādon kī tasdīq kare jo Ibrāhīm, Is'hāq aur Yāqūb se kie gae the.

⁹ Wuh is lie bhī ḵhādīm banā ki Ḡhairyahūdī Allāh ko us rahm ke lie jalāl deᅅ jo us ne un par kiyā hai. Kalām-e-muqaddas men yihī likhā hai,
“Is lie main aqwām men terī hamd-o-sanā karūᅅga,

tere nām kī tārif men gīt gāūᅅgā.”

¹⁰ Yih bhī likhā hai,

“Ai dīgar qaumo, us kī ummat ke sāth ḵhushī manāo!”

¹¹ Phir likhā hai,

“Ai tamām aqwām, Rab kī tamjīd karo!

Ai tamām ummato, us kī satāish karo!”

¹² Aur Yasāyāh Nabī yih farmātā hai,

“Yassī kī jaᅅ se ek koᅅpal phūᅅ niklegī,

ek aisā ādmī uṭhegā
jo qaumon par hukūmat karegā.

Ġhairyahūdī us par ās rakheṅge.”

¹³ Ummīd kā Ḳhudā āp ko imān rakhne ke bāis har ḳhushī aur salāmatī se māmūr kare tāki Rūhul-quḍs kī qudrat se āp kī ummīd baḥ kar dil se chhalak jāe.

Dilerī se Likhne kī Wajah

¹⁴ Mere bhāiyō, mujhe pūrā yaqīn hai ki āp ḳhud bhalāī se māmūr haiṅ, ki āp har tarah kā ilm-o-irfān rakhte haiṅ aur ek dūsre ko nasīhat karne ke qābil bhī haiṅ.

¹⁵ To bhī maiṅ ne yād dilāne kī ḳhātir āp ko kāī bāteṅ likhne kī dilerī kī hai. Kyoṅki maiṅ Allāh ke fazl se

¹⁶ āp Ġhairyahūdiyon ke lie Masīh Īsā kā ḳhādīm hūṅ. Aur maiṅ Allāh kī ḳhushḳhabrī phailāne meṅ Baitul-muqaddas ke imām kī-sī ḳhidmat saranjām detā hūṅ tāki āp ek aisī qurbānī ban jāeṅ jo Allāh ko pasand āe aur jise Rūhul-quḍs ne us ke lie maḳhsūs-o-muqaddas kiyā ho.

¹⁷ Chunāṅche maiṅ Masīh Īsā meṅ Allāh ke sāmne apnī ḳhidmat par faḳhr kar saktā hūṅ.

¹⁸ Kyoṅki maiṅ sirf us kām ke bāre meṅ bāt karne kī jurrat karūṅga jo Masīh ne merī mārifat kiyā hai aur jis se Ġhairyahūdī Allāh ke tābe ho gae haiṅ. Hāṅ, Masīh hī ne yih kām kalām aur amal se,

¹⁹ ilāhī nishānoṅ aur mojizoṅ kī quwwat se aur Allāh ke Rūh kī qudrat se saranjām diyā hai. Yoṅ maiṅ ne Yarūshalam se le kar sūbā illurikum tak

safr karte karte Allāh kī ḡhushḡhabrī phailāne kī ḡhidmat pūrī kī hai.

²⁰ Aur main ise apnī izzat kā bāis samjhā ki ḡhushḡhabrī wahān sunāūn jahān Masīh ke bāre meṅ ḡhabar nahīn pahuṅchī. Kyoṅki main aisi buniyād par tāmīr nahīn karnā chāhtā thā jo kisī aur ne ḡālī thī.

²¹ Kalām-e-muḡaddas yihī farmātā hai,
 “Jinheṅ us ke bāre meṅ nahīn batāyā gayā wuh dekheṅge,
 aur jinhoṅ ne nahīn sunā unheṅ samajh āegī.”

Paulus kā Rom jāne kā Irādā

²² Yihī wajah hai ki mujhe itnī dafā āp ke pās āne se rokā gayā hai.

²³ Lekin ab merī in ilāqon meṅ ḡhidmat pūrī ho chukī hai. Aur chūnki main itne sālon se āp ke pās āne kā ārzūmand rahā hūn

²⁴ is lie ab yih ḡhāhish pūrī karne kī ummīd rakhtā hūn. Kyoṅki main ne spen jāne kā mansūbā banāyā hai. Ummīd hai ki rāste meṅ āp se milūṅgā aur āp āge ke safr ke lie merī madad kar sakeṅge. Lekin pahle main kuchh der ke lie āp kī rifāqat se lutfandoz honā chāhtā hūn.

²⁵ Is waqt main Yarūshalam jā rahā hūn tāki wahān ke muḡaddasīn kī ḡhidmat karūn.

²⁶ Kyoṅki Makiduniyā aur Aḡhayā kī jamāton ne Yarūshalam ke un muḡaddasīn ke lie hadiyā jamā karne kā faisla kiyā hai jo ḡharīb haiṅ.

²⁷ Unhoṅ ne yih ḡhushī se kiyā aur darasl yih un kā farz bhī hai. ḡhairyahūdī to Yahūdiyon

kī ruhānī barkaton meñ sharīk hue haiñ, is lie Ġhairyahūdiyon kā farz hai ki wuh Yahūdiyon ko bhī apnī māli barkaton meñ sharīk karke un kī k̄hidmat karen.

²⁸ Chunānche apnā yih farz adā karne aur maqāmī bhāiyon kā yih sārā phal Yarūshalam ke imāndāron tak pahuñchāne ke bād main āp ke pās se hotā huā spen jāūngā.

²⁹ Aur main jāntā hūñ ki jab main āp ke pās aūngā to Masīh kī pūrī barkat le kar aūngā.

³⁰ Bhāiyo, main hamāre K̄hudāwand Īsā Masīh aur Rūhul-quds kī muhabbat ko yād dilā kar āp se minnat kartā hūñ ki āp mere lie Allāh se duā karen aur yon merī ruhānī jang meñ sharīk ho jāen.

³¹ Is ke lie duā karen ki main sūbā Yahūdiyā ke ġhairimāndāron se bachā rahūñ aur ki merī Yarūshalam meñ k̄hidmat wahān ke muqaddasīn ko pasand ae.

³² Kyonki main chāhtā hūñ ki jab main Allāh kī marzī se āp ke pās aūngā to mere dil meñ k̄hushī ho aur ham ek dūsre kī rifāqat se tar-o-tāzā ho jāen.

³³ Salāmatī kā K̄hudā āp sab ke sāth ho. Āmīn.

16

Salām-o-Duā

¹ Hamārī bahan Fībe āp ke pās ā rahī hai. Wuh Kink̄hriyā Shahr kī jamāt meñ k̄hādīmā hai. Main us kī sifārish kartā hūñ

² balki K̄hudāwand meñ arz hai ki āp us kā waise hī istiqbāl karen jaise ki muqaddasīn ko karnā chāhie. Jis muāmale meñ bhī use āp kī

madad kī zarūrat ho us meñ us kā sāth deñ, kyonki us ne bahut logon kī balki merī bhī madad kī hai.

³ Priskillā aur Akwilā ko merā salām denā jo Masīh Īsā meñ mere hamk̄hidmat rahe haiñ.

⁴ Unhoñ ne mere lie apñī jān par khelā. Na sirf main balki Ghairyahūdiyōñ kī jamāteñ un kī ehsānmand haiñ.

⁵ Un ke ghar meñ jamā hone wālī jamāt ko bhī merā salām denā.

Mere azīz dost Ipinetus ko merā salām denā. Wuh sūbā Āsiyā meñ Masīh kā pahlā pairokār yāñī us ilāqe kī fasal kā pahlā phal thā.

⁶ Mariyam ko merā salām jis ne āp ke lie baṛī mehnat-mashaqqat kī hai.

⁷ Andrūnikus aur Yūniyā ko merā salām. Wuh mere hamwatan haiñ aur jel meñ mere sāth waqt guzārā hai. Rasūloñ meñ wuh numāyāñ haisiyat rakhte haiñ, aur wuh mujh se pahle Masīh ke pīchhe ho lie the.

⁸ Ampliyātus ko salām. Wuh K̄hudāwand meñ mujhe azīz hai.

⁹ Masīh meñ hamāre hamk̄hidmat Urbānus ko salām aur isī tarah mere azīz dost Istak̄hus ko bhī.

¹⁰ Apellis ko salām jis kī Masīh ke sāth wafādārī ko āzmāyā gayā hai. Aristubūlus ke ghar wāloñ ko salām.

¹¹ Mere hamwatan Herodiyon ko salām aur isī tarah Narkissus ke un ghar wāloñ ko bhī jo Masīh ke pīchhe ho lie haiñ.

¹² Trūfenā aur Trūfosā ko salām jo K̄hudāwand kī k̄hidmat meñ mehnat-mashaqqat

kartī haiñ. Merī azīz bahan pārsis ko salām jis ne Ḳhudāwand kī ḳhidmat meñ baṛī mehnat-mashaqqat kī hai.

13 Hamāre Ḳhudāwand ke chune hue bhāi Rūfus ko salām aur isī tarah us kī māñ ko bhī jo merī māñ bhī hai.

14 Asinkritus, Faligon, Hirmes, Patrobās, Hirmās aur un ke sāthī bhāiyon ko merā salām denā.

15 Filulugus aur Yūliyā, Neriyyūs aur us kī bahan, Ulimpās aur un ke sāth tamām muḳaddasīn ko salām.

16 Ek dūsre ko muḳaddas bosā de kar salām karen. Masīh kī tamām jamāton kī taraf se āp ko salām.

Ākhirī Hidāyāt

17 Bhāiyo, main āp ko tākīd kartā hūñ ki āp un se ḳhabardār raheñ jo pārtībāzī aur ṭhokar kā bāis bante haiñ. Yih us tālīm ke ḳhilāf hai jo āp ko dī gaī hai. Un se kinārā karen

18 kyonki aise log hamāre Ḳhudāwand Masīh kī ḳhidmat nahīñ kar rahe balki apne peṭ kī. Wuh apnī mīṭhī aur chiknī-chupṛī bāton se sādālah logoñ ke dilon ko dhokā dete haiñ.

19 Āp kī farmāñbardārī kī ḳhabar sab tak pahuñch gaī hai. Yih dekh kar main āp ke bāre meñ ḳhush hūñ. Lekin main chāhtā hūñ ki āp achchhā kām karne ke lihāz se dānishmand aur burā kām karne ke lihāz se beḳusūr hoñ.

20 Salāmatī kā Ḳhudā jald hī Iblīs ko āp ke pāñwoñ tale kuchalwā ḍālegā.

Hamāre Ḳhudāwand Īsā kā fazl āp ke sāth ho.

²¹ Merā hamḵhidmat Tīmuthiyus āp ko salām detā hai, aur isī tarah mere hamwatan Lūkiyus, Yāson aur Sosipātrus.

²² Maiñ, Tirtiyus is ḵhat kā kātib hūñ. Merī taraf se bhī Ḵhudāwand meñ āp ko salām.

²³ Gayus kī taraf se āp ko salām. Maiñ aur pūrī jamāt us ke mehmān rahe haiñ. Shahr ke ḵhazāñchī Irāstus aur hamāre bhāī Kwārtus bhī āp ko salām kahte haiñ.

²⁴ [Hamāre Ḵhudāwand Īsā kā fazl āp sab ke sāth hotā rahe.]

Āḵhirī Duā

²⁵ Allāh kī tamjīd ho, jo āp ko mazbūt karne par qādir hai, kyonki Īsā Masīh ke bāre meñ us ḵhushḵhabrī se jo maiñ sunātā hūñ aur us bhed ke inkishāf se jo azal se poshīdā rahā wuh āp ko qāym rakh saktā hai.

²⁶ Ab is bhed kī haqīqat nabiyon ke sahīfon se zāhir kī gāi hai aur abadī Ḵhudā ke hukm par tamām qaumon ko mālūm ho gāi hai tāki sab imān lā kar Allāh ke tābe ho jāeñ.

²⁷ Allāh kī tamjīd ho jo wāhid dānishmand hai. Usī kā Īsā Masīh ke wasīle se abad tak jalāl hotā rahe! Āmīn.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30